

LOVAČKO DRUŠTVO

« JAREBICA » MOSTAR

**S T A T U T
LOVAČKOG DRUŠTVA
« JAREBICA MOSTAR »**

Na osnovu člana 11. Zakona o lovstvu Federacije Bosne i Hercegovine („Službene novine F/BiH“ br.04/06), člana 12. i 18. Zakona o udruženjima i fondacijama („Sl. novine Federacije BiH“ br.45/02), Skupština Lovačkog društva "Jarebica" Mostar na sjednici održanoj_05.10.2011 godine donijela je:

STATUT LOVAČKOG DRUŠTVA "JAREBICA" MOSTAR

OPĆE ODREDBE

Član 1.

Lovačko društvo Jarebica formira se radi organiziranog bavljenja lovstvom, ostvarivanja općeg interesa za unapređenje uzgoja i zaštite lovstva i iskorištavanja divljači, zaštite prirode i okoliša u očuvanju prirodnog staništa divljači, njegovanja lovačke etike i običaja ili drugih ciljeva kroz sportsko rekreacione i ekološke aktivnosti.

Član 2.

Lovstvo je javna djelatnost i obuhvata mjere zaštite i uzgoja divljači, uređenje lovišta, lovljenje divljači i racionalnu upotrebu divljači i lovišta, koji doprinosi očuvanju biološke raznolikosti ekoloških sistema i ekološke ravnoteže prirodnih staništa divljači.

Član 3.

Izbor i konstituiranje organa Društva vrši se na zastupničkom načelu. Djelatnost Društva počiva na kolektivnom radu i kolektivnoj odgovornosti njegovih organa.

Član 4.

Naziv Udruženja je: LOVAČKO DRUŠTVO "JAREBICA" (u daljem tekstu Društvo).

Odluku o sjedištu društva donosi IO društva.

Lovačko društvo „Jarebica“ Mostar sa sjedištem u ul.Fra Ambre Miletića br 30.

Član 5.

Društvo ima svojstvo pravne osobe.

Ima svoj žiro –račun.

Član 6.

Pečat Društva je okruglog oblika promjera 20 mm. i 35 mm. sa tekstom:Lovački Savez Herceg – Bosne Lovačko Društvo "Jarebica" Mostar.

U sredini pečata je lik jarebice.

Štambilj Društva ima oblik pravokutnika formata 60x20mm. sa tekstom Lovačko Društvo "Jarebica" Mostar i oznake za primljenu poštu(broj,prilozi,vrijednost i sl.).

Član 7.

Znak Društva je lik jarebice.

Član 8.

Društvo djeluje na području Grada Mostara, koje obuhvata granice bivših općina Mostar: Jug, Jugozapad i Zapad.

OSNOVNI CILJEVI I DJELATNOSTI DRUŠTVA

Član 9.

Cilj Društva je unapređivanje i razvijanje lovstva i gospodarske djelatnosti. Ovaj cilj Društvo ostvaruje svojom djelatnošću i radom svojih članova, surađuje sa lokalnom zajednicom, Lovačkim Savezom Herceg Bosne, radnim, sportskim i gospodarskim organizacijama i udrugama na području Grada Mostara, HNŽ i šire.

Član 10.

Društvo može u okviru svoje djelatnosti i programskih ciljeva osnovati subjekte za gospodarske i druge djelatnosti pod uvjetima utvrđenim u zakonu i ovim statutom i dužno je da svojim organizacijama osigura početna sredstva i druge uvjete za rad.

Član 11.

Radi ostvarivanja svojih ciljeva i zadataka Društvo, ima sljedeće zadatke:

Dugoročno, srednjoročno i kratkoročno planiranje razvitka i unapređenja lovstva na području kojim gospodari. Praćenje izvršenja planova, utvrđivanje metodologije, njihova izrada i utvrđivanje rokova njihovog izvršenja,

Da u lovištima u kojima upravlja (gospodari) obavezno vraća vrijednost lovom iznesene divljači kroz odgovarajuću naknadu koju određuje Skupština Društva,

Da štiti rijetku i prorijeđenu divljač,

Da organizira naseljavanje divljači radi povećanja njenog broja i poboljšanja njenog kvaliteta osnivanjem prirodnih i vještačkih uzgajališta,

Da uništava štetočine u lovištu,

Da organizira lovočuvarsku službu u interesu kontrole, zaštite divljači i lovišta,

Da razvija i njeguje lovnu etiku u redovima svojih članova i široj javnosti,

Da razvija samoinicijativu, organiziran rad članova i demokratske odnose,

Da stručnim radom i obrazovanjem članova kroz seminare, predavanja i slično, upoznaje i proširuje njihovo znanje iz oblasti lovstva,

Da razvija i pomaže streljačke aktivnosti članova,

Da surađuje sa drugim lovačkim organizacijama i savezima na području županije i BiH, radi usklađivanja lovne politike,

Da razvija kinološku djelatnost radi očuvanja rasnosti lovačkih pasa, nabavkom novih jedinki doprinese očuvanju naših autohtonih pasmina. Pomaže smotre lovačkih pasa i njihovo ocjenjivanje na tim smotrama

Član 12.

Za ostvarivanje svojih zadataka Društva odgovorni su Skupština, njeni organi upravljanja, njihovi organi i članovi Društva.

ČLANOVI, DUŽNOSTI I PRAVA

Član 13.

Članom Društva može postati svaki punoljetan građanin koji prihvaća Statut društva i ostale opće akte Društva u skladu sa ostalim pozitivnim zakonskim propisima.

Član 14.

Članovi Društva su:

- Redovni članovi,
- Članovi pripravnici,
- Članovi mladeži,
- Počasni članovi,
- Prijatelji Društva.
- Pridruženi članovi

Član 15.

Redovni članovi su ona lica koja nakon lovačkog pripravničkog staža polože lovački ispit i ispune sve obaveze prema Društvu a na osnovu općih akata Društva.

Član 16.

Članovi u stavu 2. u članku 14. primaju se u trajanju od jedne godine kad su dužni položiti lovački ispit za stjecanje prava za vršenje lova prema "Pravilniku o pripravničkom stažu i polaganju lovačkih ispita".

Član 17.

Osoba koja želi postati članom Društva dužno je da podnese zahtjev, na za to određenom obrascu, u kojem daje potrebne podatke o sebi, preporuku dvojice starijih članova Društva i preporuke područne Sekcije.

Danom odluke Izvršnog odbora, podnosilac zahtjeva za prijem, postaje član - pripravnik. Pripravnički staž traje 1 (jednu) godinu, nakon čega pripravnik stiče pravo polaganje lovačkog ispita.

Član 18.

Članovi mladeži su osobe mlađe od osamnaest godina, koje se na svoj zahtjev i preporuku Sekcije mogu primiti u članstvo mladeži Društva.

Član 19.

Članovi mladeži organizirano, u Sekcijama, učestvuju u zaštiti divljači, izgradnji lovno -tehničkih objekata i pošumljavanju terena (lovišta).

Članovi mladeži imaju pravo koristiti sve objekte Društva, i pravo prisustva na skupovima u Sekciji.

Član 20.

Počasni članovi Društva su one osobe - članovi koje proglasi Skupština Društva, a na prijedlog

Sekcije i Izvršnog odbora Društva. Njihovu verifikaciju vrši Lovački savez Herceg Bosne.

Počasnim članom Društva može postati lice koje svojim dugogodišnjim radom na unapređenju lovstva, a posebno u svojoj matičnoj organizaciji Sekciji postigne značajne rezultate i stekne izvanredne zasluge.

Počasni članovi se upisuju u Knjigu počasnih članova, dobivaju Uvjerenje od Lovačkog saveza Herceg Bosne o proglašenju za počasnog člana i legitimaciju počasnog člana.

Počasnom članu se iskazuju posebne počasti na svim značajnim skupovima i manifestacijama Društva i imaju sva prava redovnih članova Društva,

Počasni članovi Društva oslobođeni su od plaćanja članarine i drugih obaveza prema Društvu.

DUŽNOSTI REDOVNIH ČLANOVA SU:

Član 21.

Da čuvaju i njeguju prijateljske odnose i lovnu etiku među članovima Društva.

Da čuvaju ugled Društva, Lovačkog saveza Herceg Bosne i njihovih organa, kao i da se aktivno zalažu na suzbijanju svakog štetnog djelovanja u Društvu.

Da svojim aktivnim radom, prema planu i odlukama organa Društva, učestvuju u izvršavanju svih zadataka i ciljeva Društva.

Da izvršavanju na vrijeme i u cijelosti sve obaveze koje utvrde organi Društva.

Da o svim zapažanjima i pojavama u Društvu ili lovištu, koje mogu izazvati štete u Društvu ili da onemogućavaju izvršenje zadataka i ciljeva Društva, izvještavaju odmah nadležne organe Društva.

PRAVA REDOVNIH ČLANOVA SU:

Član 22.

Da aktivno, neposredno učestvuju u radu a prema planovima rada za pojedine vrste zadataka i poslova, pridržavajući se postojećih zakonskih propisa i općih akata Društva .

Da vrše lov divljači na način kako je to predviđeno planom izvršenja odstrela na području Društva.

Da biraju i budu birani u organe Društva.

Da podnose prijedloge, molbe i žalbe organima Društva, na način predviđen ovim Statutom i drugim općim aktima Društva.

Član 23.

Redovan član drugog Lovačkog društva koji prelazi u ovo Društvo obavezan je, uz pismeni zahtjev priložiti i ispisnicu iz članstva tog Društva.

U ispisnici treba da stoji podatak o položenom lovačkom ispitu i izvršenju svih obaveza prema prethodnom Društvu, da se ne vodi disciplinski postupak, kao ni krivični postupak i preporuka za učlanjenje u naše Društvo.

Član 24.

U lovištu Društva mogu vršiti lov redovni članovi, počasni članovi, članovi drugih lovačkih Društava i strani državljani pod uvjetima i načinu kako je to predviđeno u Pravilniku o uvjetima vršenja lova u lovištima Društva.

Član 25.

Članovi Društva stariji od 65 godina, sa lovačkim stazom više od 20 godina, oslobođeni su radnih

obaveza.

Izuzetno, a na prijedlog Sekcije Izvršni odbor Društva može, u opravdanim slučajevima (teška oboljenja i službena odsustvovanja) osloboditi i redovne članove od obaveza izvršenja radnih akcija.

PRESTANAK ČLANSTVA U DRUŠTVU:

Član 26.

Članstvo u Društvu prestaje:

- Istupanjem iz članstva Društva,
- Sudskom odlukom kojom je član osuđen, i na kaznu zatvora zbog krivičnog djela nespojivo s članstvom u Društvu kaznom zatvora dužom od 1 (jedne) godine za krivično djelo,
- Isključenjem iz Društva,
- Neblagovremenim izmirenjem utvrđenih obaveza prema Društvu,
- Smrću .

Član 27.

Član Društva kojom je prestalo članstvo po točki 1.,3., i 4. iz Člana 26. ovog Statuta, može biti ponovo primljen u Društvo pod uvjetima predviđenim ovim Statutom.

SEKCIJE DRUŠTVA

Član 28.

Radi neposrednog učešća članova u ostvarivanju svojih prava i izvršavanju zadataka i ciljeva Društva organiziraju se Sekcije Društva.

Član 29.

Sekcija je osnovna jedinica za ostvarivanje prava i provođenje utvrđenih zadataka Društva.

Sekciju sačinjavaju svi članovi - lovci nastanjeni na području na kojem je organizirana Sekcija, kao i oni članovi koji se iz opravdanih razloga usmjere - rasporede ili dobrovoljno opredijele za rad u toj Sekciji.

Odluku o usmjeravanju - raspoređivanju i dobrovoljnom opredjeljivanju članova donosi Izvršni odbor Društva.Sekcija mora da broji najmanje 25. članova. U protivnom Skupština Društva donosi odluku o prestanku rada sekcije i upućuje članstvo u druge sekcije i ostavlja mogućnost ukoliko se sakupi potreban broj članova da se ponovo aktivira rad sekcije.Sekcija koja ima veliki broj članova može uputiti zahtjev Skupštini Društva za razdvajanje u dvije zasebne sekcije.

Član 30.

U Društvu se utvrđuju sljedeće Sekcije i to:

Sekcija

- 1.Sekcija Bogodol
- 2.Sekcija Buna
- 3.Sekcija Cim, Ilići, Vihovići
- 4.Sekcija Kruševo
- 5.Sekcija Goranci

- 6.Sekcija Polog
- 7.Sekcija Raška Gora
- 8.Sekcija Rodoč
- 9.Sekcija Vrđi

Član 31.

Radi što neposrednijeg učešća članova Društva u izvršavanju zadataka u okviru sekcije formiraju se lovne grupe.

Odluku o rasporedu i brojnosti lovne grupe, Skupština Sekcije, donosi i potrebi mijenja i dopunjuje. Na čelu lovne grupe je grupovođa.

Brojno stanje lovaca redovito prati Izvršni Odbor po isteku dogovorenog roka za plaćanje članarine.

Područja na kojima djeluje Sekcija su utvrđene i obilježene na karti lovišta, sa obilježenim granicama i opisom.

Svaka sekcija je dužna ostvariti suradnju sa organima u mjesnim zajednicama na kojima djeluju, a u interesu što boljeg rada i izvršavanja zadataka po pitanjima lovstva i zaštiti divljači i drugim pitanjima od općeg interesa.

Član 32.

Dužnosti članova Društva u okviru Sekcije su:

Da sprovode i izvršavanju utvrđene zadatke godišnjim, srednjoročnim i dugoročnim planovima razvoja Društva, kao i odluke i zaključke organa upravljanja, a sve u cilju unapređenja lovstva na području sekcije,

Da dijelom lovišta koje je dano na upravljane gazduju pažnjom dobrog domaćina,

Da na području sekcije sprečavaju krivolov, a lovokradice prijavljuju i predlažu za disciplinsko odnosno krivično gonjenje,

Da učestvuju u svim akcijama koje organiziraju organi Društva u cilju unapređenja lovstva,

Da izvršavaju i druge zadatke koji doprinose unapređenju lovstva na području Sekcije i Društva.

Da se aktivno uključe u slučaju nepogoda kao što su požari i poplave u gašenje i smanjenje šteta u lovištu.

Član 33.

Prava članova Društva u okviru Sekcije su:

Da se u okviru Zakona i drugih propisa kao i normativnih akata Društva bave lovom, kao sportom, u lovištu kojim upravlja Društvo,

Da u okviru godišnjeg, srednjoročnog i dugoročnog plana za unapređenje lovstva odlučuju i predlažu konkretne mjere,

Da biraju i budu birani u organe, Sekcije i to u Izvršni odbor (predsjednika, lovnik, kinološkog referenta i referenta za streljaštvo).

Da utvrđuju organizaciju rada u cilju najefikasnijeg djelovanja na unapređenju uzgoja i zaštite plemenite divljači na području sekcije.

Član 34.

Sekcija ima svoje organe i to:

Skupština Sekcije koju sačinjavaju svi članovi sekcije.

Izvršni odbor Sekcije koji broji 5 (pet) članova.

Skupštinom lovaca rukovodi predsjednik Sekcije kojeg bira Skupština Sekcije i to iz reda svojih članova, na mandat od 4 (četiri) godine, sa mogućnošću ponovnog izbora.

Skupština Sekcije bira iz redova svojih članova: lovnik i kinološkog referenta, referenta za

streljaštvo i to na mandat od 4 (četiri) godine,sa mogućnošću ponovnog izbora.

Lovnik je zamjenik predsjednika Sekcije.

Skupština Sekcije bira zastupnike u Skupštinu Društva po principu jedan zastupnik na 15.(petnaest) članova - lovaca. Predsjednik sekcije je ujedno i predsjednik Izvršnog odbora Sekcije.

Član 35.

Skupština Sekcije održava se prema potrebi, a najmanje 1 (jedan) put godišnje. Skupština Sekcije može punovažno da radi i odlučuje ako mu prisustvuje natpolovična većina članova. Skupštinu Sekcije priprema Izvršni odbor Sekcije, a saziva ga predsjednik Sekcije.

Član 36

Skupština Sekcije razmatra sve zaključke i zadatke na planu unapređenja lovstva koje su donijeli Skupština, organi upravljanja na nivou Društva i Lovački Savez Herceg Bosne.

Svi članovi Sekcije su odgovorni za stanje i red u Sekciji, pa u tom smislu imaju pravo inicijative posebno na usavršavanju odnosa u Sekciji, unapređenju lovstva kao i pravo da biraju i budu birani u organe upravljanja, odbore i komisije na nivou Sekcije i Društva.

Član 37.

Izvršni odbor sekcije obavlja sljedeće poslove:.

Organizira i kordinira rad u Sekciji,

Priprema materijale za Skupštinu Sekcije,

Provodi Odluke i Zaključke Skupštine Sekcije,

Sprovodi planove lovstva o unapređenju stanja u lovištu,organizira volontersku lovočuvarsku službu kao redovne patrole i pomoć lovočuvaru Društva.

Stara se o unapređenju kinologije u Sekciji i razvoju lovnog strjeljaštva

Radi na unapređivanju i stručnom obrazovanju članova Sekcije,

Razvija suradnju sa mjesnim zajednicama na području Sekcije kao i sa drugim organima lokalne zajednice,

Izrađuje planove rada u lovištu sukladno zadatcima dobivenim od Izvršnog odbora.

Za svoj rad odgovoran je Skupštini Sekcije, Izvršnom odboru Društva i Skupštini Društva.

Član 38.

Izbori u Sekciji održavaju se svake četvrte godine skladno ovom Statutu.

Član 39.

Lovna područja na kojem djeluju Sekcije (- Član 30. ovog Statuta) čine jedinstvenu cjelinu Društva tako da svi članovi Društva imaju pravo lova na svim lovnim površinama svih sekcija, pod jednakim uvjetima.

Član 40.

Članovi Sekcija, odnosno Društva ostvaruju svoja prava neposrednim učešćem i putem organa upravljanja i to:

Odlučivanjem na Skupštini Sekcije, neposrednim učešćem,

Odlučivanjem na Skupštini Društva, neposrednim učešćem ili putem zastupnika.

Član 41.

Na Skupštini Sekcije obavezno se raspravlja o sljedećim pitanjima:

O nacrtu Statuta i svih općih akata Društva,

O nacrtu godišnjeg, kratkoročnog i dugoročnog plana razvoja lovstva na području Društva,

O nacrtu plana prihoda i rashoda za svaku godinu,

O izvještajima i o radu organa upravljanja Društva,

Raspravlja o svim pitanjima predviđenim ovim Statutom i drugim normativnim aktima Društva,

ORGANI DRUŠTVA

Član 42.

Organi Društva su:

Skupština Društva

Izvršni odbor Društva

Nadzorni odbor Društva

Stegovno povjerenstvo

SKUPŠTINA DRUŠTVA

Član 43.

Skupština Društva je najviši organ Upravljanja u okviru prava i dužnosti Društva.

Skupština Društva vrši svoja prava i dužnosti na osnovu i u okviru Zakona o udruženjima i fondacijama, Zakona o lovstvu, Statuta Lovačkog saveza Herceg Bosne i ovog Statuta.

Član 44.

Skupštinu sačinjavaju članovi Izvršnog odbora Društva i zastupnici izabrani u Sekcijama po principu 1 zastupnik na 15 članova.

Mandat članova Skupštine traje 4 (četiri) godine.

Član 45.

Skupština može biti izborna, redovna i izvanredna.

Član 46.

Izborna Skupština održava se svake četvrte godine. Redovna Skupština održava se jednom godišnje.

Izvanredna Skupština saziva se prema potrebi.

Član 47.

Skupštinu priprema Izvršni odbor Društva, a saziva je predsjednik Društva i to: izborna i redovna.

Izvanredna Skupština saziva se najkasnije 15 (petnaest) dana po podnesenom zahtjevu za

održavanjem izvanredne Skupštine.
Zahtjev za sazivanje izvanredne Skupštine mogu podnijeti:
1/3 zastupnika Skupštine
Nadzorni odbor Društva.
Izvršni odbor Društva.

Član 48.

Skupština raspravlja o svim pitanjima koja se odnose na razvoj lovstva i rada Društva, a isključivo u njenu nadležnost spadaju sljedeći poslovi:

Donosi i dopunjuje Statut Društva,

Utvrđuje politiku razvoja lovstva na području Društva i Lovačkog saveza Herceg Bosne, i u tom smislu donosi godišnje, kratkoročne i dugoročne planove razvoja lovstva, kao i godišnje planove prihoda i rashoda,

Bira i razrješava i potvrđuje:

Potvrđuje Izvršni Odbor Društva,

Bira članove Nadzornog odbora,

Bira članove Stegovnog povjerenstva.

Razmatra izvješće o radu Izvršnog odbora, Nadzornog odbora i Stegovnog povjerenstva,

Rješava o prijedlozima i zahtjevima sekcija, Izvršnog odbora, Nadzornog odbora i Stegovnog povjerenstva,

Donosi Poslovnik o radu Skupštine,

Donosi lovno gospodarsku osnovu,

Donosi Prijedlog odluke o proglašenju počasnih članova Društva,

Predlaže i dodjeljuje priznanja članovima Društva za postignute rezultate u radu, na izvršenju zadataka i poslova u Društvu,

Usvaja završni račun Društva,

Usvaja kalendar lova na prijedlog Komisije za unapređenje lovstva.

Stara se o stručnom usavršavanju članova,

Utvrđuje visinu doprinosa, visinu članarine, upisnine za nove članove, naknade za odstrjel divljači, pristojbi i drugih obaveza članova Društva.

Obavlja i druge poslove koji su od interesa za Društvo,

Daje ovlaštenja Izvršnom odboru Društva da u izuzetnim slučajevima može odlučivati o pitanjima iz nadležnosti Skupštine,

Odlučuje o podnesenim žalbama i molbama članova Društva,

Donosi Odluku o prestanku rada Društva.

Član 49.

Skupština Društva punovažno radi i odlučuje ako je prisutno više od polovine zastupnika Društva, a odluke donosi većinom glasova prisutnih zastupnika.

Član 50.

Ukoliko na početku rada Skupštine nije prisutno više od polovine članova - zastupnika, Skupština se odlaže za jedan sat, a nakon toga ukoliko nema natpolovične većine zastupnika Skupština se odgađa.

Član 51.

Odluke i zaključke koje Skupština donese obvezne su za sve organe i članove Društva.

Član 52.

Skupština punovažno odlučuje ako je prisutna natpolovična većina izabranih zastupnika. Odluke Skupštine donose se **većinom** glasova nazočnih zastupnika. Statut Društva, njegove izmjene i dopune usvajaju se dvotrećinskom većinom glasova nazočnih članova. Glasovanje se vrši javno dizanjem ruke ako Skupština ne odluči drugačije.

Član 53.

Sekcije i članovi Društva pojedinačno, mogu dostavljati pismene prijedloge o pitanjima koja su na dnevnom redu Skupštine. U razmatranju i radu Skupštine uzimati će se i oni prijedlozi koji budu usmeno izloženi, na samoj Skupštini.

Član 54.

Skupština bira i potvrđuje iz redova članova Društva:
Članove Izvršnog odbora čiji broj ovisi o broju sekcija (trenutno je 9)
Članove Nadzornog odbora -5 članova
Članove Disciplinskog Suda -5 članova
Predsjednika, potpredsjednika, tajnika iz redova predsjednika Sekcija.
Lovnika Društva.
Svi ovi organi biraju se na 4 (četiri) godine (mandat),sa mogućnošću ponovnog izbora.

Član 55.

O dnevnom redu i pitanjima koja će se raspravljati na Skupštini, najmanje 10 (deset) dana ranije, moraju se upoznati sve sekcije Društva u pismenom obliku.

Član 56.

Ako organi Društva iz Člana 42. ovog Statuta ne izvršavaju zadatke i obaveze, mogu biti opozvani i prije isteka mandata. Inicijativu za opoziv može pokrenuti Predsjednik Društva, Izvršni Odbor, Nadzorni odbor, i natpolovična većina članova prisutnih na Skupštini.

Član 57.

Sjednicama skupštine predsjedava:
Predsjednik Društva, u slučaju opravdane spriječenosti zamjenjuje ga lovnik.

Član 58.

Predsjednik Društva i Izvršnog odbora u obje funkcije zastupa i predstavlja Društvo i Izvršni odbor pred svim društvenim, državnim i drugim organima i organizacijama.

IZVRŠNI ODBOR DRUŠTVA

Član 59.

Izvršni odbor Društva (u daljem tekstu Izvršni odbor) je izvršni organ Skupštine Društva koji provodi sve odluke i zaključke Skupštine, normativna akta Društva i zakonitost.

Izvršni odbor prati i analizira problematiku lovstva i ostalih djelatnosti Društva i predlaže Skupštini poduzimanje mjera za rješavanje tih problema.

Izvršni odbor priprema materijale za Skupštinu i predlaže Skupštini pitanja koja bi trebalo razmatrati na Skupštini.

U izuzetno hitnim slučajevima Izvršni odbor može poduzimati mjere iz nadležnosti Skupštine, a koji su u skladu sa politikom i normativnim aktima Društva. O tome podnosi izvještaj Skupštini i traži saglasnosti o izvršenim radnjama.

Član 60.

Izvršni odbor čine predsjednici sekcija (ovisno o broju sekcija) i lovnik.

Članovi Izvršnog odbora između sebe na prvom sastanku biraju predsjednika Izvršnog odbora, lovника i tajnika Društva i daju Skupštini na potvrdu .

Predsjednik Izvršnog odbora ujedno je i predsjednik Lovačkog društva, dok se lovnik bira neovisno.

Član 61.

Izvršni odbor obavlja sljedeće poslove:

Priprema materijale za Skupštinu Društva,

Provodi odluke i zaključke Skupštine Društva i Lovačkog saveza Herceg Bosne,

Kordinira rad Komisija i drugih tijela Društva,

Provodi finansijski plan Društva,

Provodi planove unapređenja lovstva,

Stara se o unapređenju programa rada kinologije i lovnog streljaštva,

Rješava po žalbama i molbama članova Društva,

Vrši suspenziju članova Društva do okončanja disciplinskog postupka,

Radi na unapređenju stručnog obrazovanja članova,

Bira stalne i povremene Komisije,

Suraduje sa odgovarajućim organima Skupštine Društva, Lovačkim savezom Herceg Bosne, sa državnim i drugim organima općine, kantona, sa drugim udruženjima ako je to od interesa a posebno sa organima Šumarstva i policijskim upravama,

Koordinira rad i organizira funkcioniranje Sekcija,

Obavlja i sve druge poslove i zadatke koje mu povjeri i stavi u zadatak Skupština,

Organizira i provodi polaganje lovačkih ispita.

Član 62.

Izvršni odbor sastaje se po potrebi, a najmanje jednom mjesečno. Sjednice Izvršnog odbora zakazuje predsjednik, koji ujedno i rukovodi (predsjedava) sjednicama.

Član 63.

Izvršni odbor radi po Poslovniku o radu Izvršnog odbora.

ODBORI I KOMISIJE SKUPŠTINE

NADZORNI ODBOR

Član 64.

Kontrolu rada organa i komisija Skupštine i Izvršnog odbora vrše članovi Društva putem Nadzornog odbora Društva kojeg bira Skupština Društva.

Član 65.

Skupština bira (5) članova Nadzornog odbora Društva i imenuje predsjednika. Nadzorni odbor nadzire cjelokupan rad Društva i odgovoran je za svoj rad Skupštini Društva.

Član 66.

Nadzorni odbor vrši cjelokupan nadzor (kontrolu) nad materijalno - financijskim poslovanjem Društva, primjenu zakonskih propisa u radu organa Skupštine i Izvršnog odbora, o provođenju odredaba ovog Statuta kao i drugih normativnih akata Društva i svim drugim zadacima koje mu naloži Skupština Društva.

Član 67.

Mandat članova Nadzornog odbora traje 4 (četiri) godine, sa mogućnošću ponovnog izbora.

Član 68.

Nadzorni odbor može punovažno raditi i odlučivati ako je na sjednici prisutno najmanje (3) člana. Odluke se donose većinom glasova prisutnih članova na sjednici.

Član 69.

Nadzorni odbor je dužan najmanje jednom godišnje podnijeti izvještaj o svom radu Skupštini Društva.

Član 70.

O utvrđenim nepravilnostima Nadzorni odbor će obavijestiti Izvršni odbor Društva i tražiti otklanjanje istih, a u slučaju većih nepravilnosti tražiti će održavanje izvanredne Skupštine Društva.

Član 71.

Lica koja obavljaju materijalno - financijske poslove kao i predsjednici svih organa dužni su pružiti na uvid svu dokumentaciju odnosno aktivno surađivati u radu Nadzornog odbora Društva.

STEGOVNA I MATERIJALNA ODGOVORNOST

Član 72.

Ako se članovi Društva ogriješe o odredbe Zakona o lovu, propise koji reguliraju lov, odredbe ovog Statuta, Pravilnike, zaključke i odluke Skupštine i Izvršnog odbora Društva, podliježu stegovnoj odgovornosti, a po ukazanoj potrebi i materijalnoj odgovornosti.

Član 73.

Ako je prestup takav da sa sobom povlači. odgovornost pred redovnim sudovima ova odgovornost ne isključuje i stegovni postupak od strane organa Društva.

Član 74.

Stegovna i materijalna odgovornost Društva regulira se posebnim Pravilnikom o stegovnoj i materijalnoj odgovornosti članova Društva, kojeg donosi Skupština Društva. Troškovi stegovnog postupka padaju na teret Društva.

STEGOVNO POVJERENSTVO

Član 75.

Stegovni postupak i postupak naknade štete vodi Stegovno povjerenstvo Društva, koji izriče i mjere a u skladu sa Pravilnikom o stegovnoj i materijalnoj odgovornosti Društva.

Član 76.

Stegovni povjerenstvo Društva sastoji se od pet(5) člana i pet(5) zamjenika koje bira Skupština Društva iz redova svojih članova.

Mandat članova i zamjenika Stegovnog povjerenstva traje četiri(4) godine, sa mogućnošću ponovnog izbora.

Ukoliko neki od članova i zamjenika Stegovnog povjerenstva ne izvršavaju svoje obveze, na njihovo mjesto može se birati drugi član i prije isteka mandata za koji je izabran.

Član 77.

Stegovno povjerenstvo utvrđuje odgovornost člana Društva na osnovu prijave koju podnosi Izvršni odbor, Sekcija, nadležni državni organi, članovi Društva i građani.

Sve odluke povjerenstva su važeće ukoliko prisustvuju najmanje četiri(4) člana.

Član 78.

Stegovno povjerenstvo na usmenoj raspravi ispituje i utvrđuje okolnosti i činjenice koje smatra važnim za utvrđivanje odgovornosti člana Društva protiv kojeg se vodi postupak.

Član 79.

Po okončanju postupka Stegovno povjerenstvo na osnovu vijećanja donosi odluku o odgovornosti, stegovnoj mjeri i visini eventualne štete i to većinom glasova.

Okrivljeni član ima pravo na branioca.

Član 80.

Niko ne može biti proglašen krivim za stegovnu povredu a da prethodno nije saslušan o djelu za koji je prijavljen.

Izuzetno, Stegovno povjerenstvo može donijeti svoju odluku i na osnovu dokaznog materijala koji je dostavljen uz prijavu, ako se prijavljeni nije odazvao pozivu Suda neopravdano, na poziv koji mu je uredno dostavljen.

Član 81.

Sjednice Stegovnog povjerenstva zakazuje i njime predsjedava predsjednik Stegovnog povjerenstva.

Na sjednici Stegovnog povjerenstva vodi se zapisnik kojeg vodi zapisničar koje je određen od strane Izvršnog odbora Društva.

Član 82.

Postupak se može voditi ukoliko nije nastupila zastara, i to:

za godinu dana nakon učinjene povrede izuzetno, za tri godine ukoliko je povreda - prestup takav da se izriče mjera isključenja iz članstva Društva.

Član 83.

Ako se utvrdi da je radnja takvo djelo za koje su nadležni redovni sudovi, Stegovno povjerenstvo će o tome obavijestiti Izvršni odbor Društva radi pokretanja postupka kod redovnih sudova.

Član 84.

Ukoliko u prijavi nema dovoljno dokumenata za pokretanje postupka, Stegovno povjerenstvo će tražiti dopunu od podnosioca prijave odnosno predložiti će Izvršnom odboru Društva da se postupak obustavi navodeći razloge za to.

Član 85.

Izvršni odbor Društva može suspendirati člana Društva protiv kojeg je pokrenut stegovni postupak, ako interes Društva to zahtijeva. Protiv rješenja o suspenziji nije dozvoljen prigovor - žalba.

Član 86.

Stegovno povjerenstvo za svoj rad odgovoran je Izvršnom Odboru i Skupštini Društva i obavezan je jednom godišnje podnijeti izvještaj o svom radu.

Član 87.

Mjere za stegovne povrede su sljedeće:

Pismeni ukor,

Odstranjenje sa funkcije u organima Društva,

Zabrana lova od šest mjeseci do dvije godine, i

Isključenje iz članstva Društva, od jedne do tri godine.

Trajno isključenje.

Pored navedenih mjera obvezno se naplaćuje ulovljena divljač po odštetnom cjeniku.

Član 88.

Mjere iz Člana 90. ovog Statuta, izuzev mjere odstranjenja sa funkcije u organima Društva izriče Stegovno povjerenstvo.

Mjere odstranjenja sa funkcija u organima Društva izriče organ koji ga je izabrao za tu funkciju.

Mjere odstranjenja sa funkcije predlaže Stegovni sud i Izvršni odbor Društva.

Član 89.

Član Društva kome je izrečena disciplinska mjera zabrane lova ili isključenja iz Društva, nakon proteka najmanje jedne polovine vremena izrečene mjere na njegovu molbu i na prijedlog Sekcije može se smanjiti izrečena mjera.

Odluku o smanjenju izrečene mjere donosi Izvršni odbor Društva.

Član 90.

Za vođenje postupka protiv člana Nadzornog odbora, Stegovnog povjerenstva, Izvršnog odbora i lovniku potrebna je suglasnost Skupštine Društva.

KOMISIJE IZVRŠNOG ODBORA DRUŠTVA

KOMISIJA ZA UNAPREĐENJE LOVSTVA

Član 91.

Komisija za unapređenje lovstva i lovnu etiku ima onoliko članova koliko ima Sekcija (ovisno o broju sekcija) a čine je lovnicima Sekcija.

Predsjednik komisije je po funkciji lovnik Društva.

Član 92.

Komisija vrši sljedeće poslove:

Provodi u djelo lovno-gospodarsku osnovu i predlaže godišnje planove rada,

Predlaže plan gazdovanja lovištem (godišnje planove odstrela divljači),

Prati izvršenje plana odstrela divljači, kako bi se isti kretao u okviru određenog plana,

Organizira i provodi mjere zaštite, prehrane i uzgoja plemenite divljači,

Organizira i provodi skupne lovove plemenite divljači,

Organizira akcije odstrela štetočina u lovištu,

Predlaže eventualne izmjene u izvršavanju ostalih obaveza i poslova u lovištu.

Organizira i nadzire rad lovočuvarske i volonterske lovočuvarske službe.

Predlaže Izvršnom Odboru na pohvalu i odlikovanje zaslužne članove-lovce koji su svojim ponašanjem i radom doprinijeli razvoju lovstva i lovne etike u Društvu.

Komisija za unapređenje lovstva o svim za lovstvo bitnim pitanjima traži stručno mišljenje od Komisije za stručno obrazovanje informiranje.

KOMISIJA ZA KINOLOGIJU I LOVNO STRIJELJAŠTVO

Član 93.

Komisija za kinologiju i lovno strijeljaštvo broji (6) članova , predsjednika bira Skupština Društva.

Članovi komisije su po funkciji birani iz reda kinoloških referenata (3 člana) i iz referenata za strjeljaštvo (3 člana) po Sekcijama.

Član 94.

Komisija za kinologiju stara se o uzgoju rasnih lovačkih pasa a naročito vrši sljedeće poslove:;
Prati kinološke manifestacije i surađuje sa kinološkim društvom "Mostar" .
Daje stručnu pomoć članovima na odabiranju vrste lovačkog psa , preporučuje učešće pasa na radnim utakmicama.

Vodi evidenciju o psima koji imaju položen radni ispit.

Surađuje sa kinološkim savezima na nivou države Bosne i Hercegovine,

Radi sve druge poslove iz oblasti kinologije i na osposobljavanju članova Društva na uzgoju rasnih lovačkih pasa.

Komisija za strjeljaštvo organizira sve vidove lovnog strjeljaštva (ovisno o interesu lovaca) priprema i organizira društvena takmičenja, vrši odabir ekipa za takmičenja na Županijskoj i Saveznoj razini.

KOMISIJA ZA STRUČNO OBRAZOVANJE I INFORMIRANJE

Član 95.

Komisija za stručno obrazovanje i informiranje broji pet članova, a imenuje je Izvršni odbor.

Član 96.

Komisija ima zadatke da stručno obrazuje - osposobljava članove Društva po pitanju lovstva uopće.

Kao naročiti zadaci ove komisije su:

Organiziranje stručnih predavanja i prikazivanje nastavnih filmova iz oblasti lovstva,

Organiziranje predavanja iz uzgoja, prehrane i zaštite svih vrsta divljači,

Osposobljavanje članova o načinu organiziranja vršenja lova, uništavanja štetočina, lovačkoj opremi, municiji i lovnoj etici,

Osposobljavanje članova na izgradnji lovno - tehničkih objekata u lovištu solila, hranilišta, čeka, staza i dr.),

Osposobljava i utiče na svijest članova u vezi sa zaštitom prirode i čovjekove okoline,

Organizira predavanja u vezi upoznavanja Zakona o lovstvu; Zakona o nabavci, držanju i nošenju oružja i svim normativnim aktima Društva,

Surađuje sa uredništvom glasila „Hoop“ i izdaje bilten Društva.

Iznalazi sve mogućnosti informiranja članova Društva i organa Društva o svim novostima od interesa za lovstvo.

Organizira stručna predavanja za lovce pripravnike.

KOMISIJA ZA POLAGANJE LOVAČKIH ISPITA

Član 97.

Komisija za polaganje lovačkih ispita broji tri člana i tri zamjenika člana. Predsjednika ove komisije članove imenuje Izvršni odbor Društva.

Član 98.

Komisija za polaganje lovačkih ispita vrši organizirano pripremanje članova - pripravnika na savlađivanju potrebnog obima znanja za polaganje lovačkog ispita.

Član 99.

Članovi - pripravnici polažu lovački ispit po zakonom propisanom Pravilniku o polaganju lovačkog ispita.

Član 100.

Komisija, na osnovu zaključka Izvršnog odbora, u određenim terminima tj. prije polaganja lovačkog ispita, provjerava putem Sekcije pripremljenost kandidata i njegov rad na terenu, o čemu Sekcija daje i pismeno mišljenje. Na osnovu prikupljenih podataka prijavljuje termin polaganja ispita Tajniku Lovачkog Saveza Herceg Bosne.

METOD RADA U DRUŠTVU

Član 101.

Rad u Društvu u okviru utvrđenih obaveza zasnovan je a principu dobrovoljnosti i bez naknade. Izbjegavanje rada na unapređenju lovstva, bez opravdanih razloga, ometanje drugih članova u izvršavanju obaveza, a naročito grupašenje i potkopavanje jedinstva u Društvu predstavlja vrlo tešku povredu odredbi Statuta Društva.

Član 102.

Članovi Društva koji nisu u mogućnosti sa osobnim radom izvrše određene obaveze mogu te obaveze izvršiti novčanom naknadom vrijednost tog rada.

Visinu novčane naknade određuje Izvršni odbor Društva.

Iznalazi sve mogućnosti informiranja članova Društva i organa Društva o svim novostima od interesa za lovstvo,

Organizira propagandnu aktivnost o sportsko - rekreacionoj koristi članova - lovaca, a u svrhu omasovljenja Društva

Član 103.

Svaki član Društva je obvezan u lovištu odraditi onoliko radnih akcija koliko odredi Izvršni Odbor, a najmanje 2 (dvije) radne akcije.

Član 104.

Član Društva koji bude upućen na izvršenje nekog zadatka izvan područja općine, ima pravo na putne troškove i dnevnice u visini koje utvrdi Izvršni odbor Društva.

Član 105.

Shodno odredbama Zakona o lovstvu ulovljena divljač i njeni dijelovi mogu se koristiti u skladu sa Pravilnikom donesenim na zakonskim odredbama.

Izvršni odbor će utvrditi koja vrsta od ulovljene divljači i u kojoj količini pripada članu -lovcu Društva.

Cijena ulovljene divljači i njeni dijelovi ne mogu biti ispod 30% od minimalne propisane cijene.

Dio divljači koja pripadne članu - lovcu Društva ne može se i zabranjuje se prodavati trećim licima (trgovina).

Cijene će biti korigirane prema cjeniku iz pod zakonskih akata Zakona o lovstvu kada bude donesen, a sukladno članku 62. Federalnog Zakona o lovstvu.

SREDSTVA DRUŠTVA

Član 106.

Za obavljanje svojih funkcija i ostvarenje programskih zadataka Društvo ima prihode sa kojima samostalno raspolaže. Prihodi udruženja su:

Članarine, upisnine i doprinosi članova Društva,

Doprinosi od ostvarenih taksi i korištenja lovačkih objekata,

Sredstva od ulovljene divljači,

Prihodi od organizirane gospodarske djelatnosti- sukladno Zakonu.

Član 107.

Financijski plan Društva utvrđuje Skupština Društva za svaku godinu na prijedlog Izvršnog odbora Društva, uz prethodna razmatranja na Zborovima lovaca u Sekcijama.

Član 108.

Ako se financijski plan ne donese do kraja 30.09. tekuće godine, za sljedeću godinu će se financiranje vršiti na osnovu privremenog financijskog plana, kojeg će donijeti Izvršni odbor Društva.

Na osnovu privremenog financijskog plana financiranje se može obavljati najduže 3 mjeseca, a nakon toga Skupština Društva mora donijeti financijski plan za tu godinu, kao je to rečeno u Članu 110. ovog Statuta.

Član 109.

Naredbodavac za izvršenje financijskog plana je predsjednik Društva, odnosno predsjednik Izvršnog odbora Društva.

Član 110.

Radi ostvarivanja zajedničkih zadataka i poslova Društvo može udruživati sredstva sa drugim lovačkim organizacijama, gospodarskim subjektima i sl.
Odluku o udruživanju sredstava donosi Skupština Društva, nakon analize potrebe i opravdanosti tog udruživanja sredstava.

Član 111.

Način financijskog poslovanja Društva regulira se posebnim Pravilnikom i financijskim planom, kojeg donosi Skupština Društva, a u duhu postojećih propisa o financiranju i poslovanju Društva građana.

PRIZNANJA ZA RAD I PODSTICANJE USPJEHA

Član 112.

Za zasluge i uspjehe u unapređenju lovstva i u lovačkom društvenom radu, Društvo dodjeljuje pojedincima priznanja za rad i uspjehe.

Član 113.

Priznanja za rad i uspjehe iz prethodnog člana su :
Plaketa za zasluge u lovstvu
Lovačko odličje 3, 2, 1-og reda za zasluge u lovstvu.

Član 114.

Za naročite zasluge i uspjehe na unapređenju lovstva a na prijedlog Komisije za unapređenje lovstva i na osnovu svojih prijedloga Izvršni Odbor donosi odluku za dodjelu priznanja.
Postupak oko dodjele priznanja vrši se na osnovu Pravilnika o dodjeli priznanja za rad i uspjehe.

STRUČNA SLUŽBA DRUŠTVA

Član 115.

U cilju ostvarivanja zadataka i poslova Društva i osiguranja normalnog funkcioniranja i rada svih organa Društva ustanovljava se stručna služba Društva.

Član 116.

Stručnu službu Društva sačinjavaju:

uposlenik koji obavlja administrativno - tehničke poslove, materijalno - finansijske i druge poslove,

lovočuvari,

lica koja se angažiraju za obavljanje privredne djelatnosti,

lica povremeno angažirana.

Član 117.

Uposlenik koji obavlja administrativne i tehničke poslove, materijalno - finansijske poslove, lovočuvari i lica koja se angažiraju za vršenje privredne djelatnosti - su lica sa odgovarajućom stručnom spremom - kvalifikacijama.

PRESTANAK RADA DRUŠTVA

Član 118.

Društvo prestaje sa radom kada Skupština Društva donese Odluku o prestanku rada Društva, ili kada nadležni organ donese Odluku o zabrani rada Društva.

Član 119.

Nadležno tijelo će donijeti odluku o zabrani rada tj. prestanku rada Društva u slučajevima: ako se utvrdi da je Društvo prestalo djelovati ili je proteklo dvostruko više vremena od vremena utvrđenog Statutom za održavanje godišnje Skupštine, a Skupština nije održana, ako se broj članova Društva smanji ispod broja određenog za osnivanje Društva, ako djeluje suprotno odredbama Statuta ili ako ne ispunjava zadatke tj. ciljeve radi kojih je Društvo osnovano ili obavlja djelatnosti za koje nije registrirano.

Ako je rad Društva zabranjen iz razloga utvrđenim u Zakonu o udruženjima i fondacijama („Sl. novine Federacije BiH“ br.45/02).

Član 120.

Skupština Društva će donijeti odluku o prestanku rada Društva u slučajevima: ako broj članova Društva padne ispod broja članova, koliko je bilo potrebno da se Društvo osnuje.

Ako Društvo dođe u situaciju da ne može više opstati u nedostatku finansijskih sredstava, što bi dovelo u pitanje provođenje dugoročnog, srednjoročnog i kratkoročnog plana rada Društva.

U slučaju prestanka rada Društvo će o eventualno stečenoj imovini naknadno donijeti odluku na Skupštini.

IZMJENE I DOPUNE STATUTA DRUŠTVA

Član 121.

Izmjene i dopune Statuta vrši Skupština Društva. Prijedlog za izmjene i dopune Statuta može podnijeti Izvršni odbor Društva, a inicijativu mogu davati Sekcije, Nadzorni odbor i članovi Društva.

Član 122.

Prijedlozi, koji nisu potekli od Izvršnog odbora Društva moraju se u pismenoj formi dostaviti 15 (petnaest) dana ranije - prije održavanja Skupštine. Prijedlozi se dostavljaju Izvršnom odboru Društva, koji je dužan prijedlog uvrstiti u dnevni red Skupštine.

Član 123.

Tekst prijedloga, izmjena i dopuna Statuta Izvršni odbor je obavezan dostaviti na razmatranje svim Sekcijama, koje će na zborovima lovaca Sekcije upoznati članstvo o sadržaju prijedloga.

Član 124.

Na osnovu ovog Statuta, Zakona o lovstvu, Zakona o držanju i nošenju lovačkog oružja, Statuta Lovачkog saveza Herceg Bosne, Društvo će donijeti i potrebne Pravilnike u kojima će se detaljnije razraditi svi poslovi, zadaci i funkcioniranje Društva. Pravilnici moraju biti doneseni i usvojeni najkasnije 6 (šest) mjeseci od donošenja i usvajanja ovog Statuta.

Pravilnike donosi Izvršni Odbor .

Član 125.

Tumačenje ovog Statuta, odnosno njegovih odredbi daje Izvršni odbor Društva.

Član 126.

Ovaj Statut stupa na snagu danom donošenja na Skupštini Društva, o čemu će se donijeti posebna Odluka, kao sastavni dio ovog Statuta.
Donošenjem ovog Statuta prestaje važiti Statut donesen 23.10.1998. godine.

Broj:06-12/10
Datum,07.12.2010.

PREDSJEDNIK DRUŠTVA

ŽELJKO DŽIDIĆ